

Sukan bersama demi bangun masyarakat inklusif

DALAM usaha membangun semangat inklusif dalam masyarakat, sebuah karnival sukan belia tahunan, Romp, kali ini memberi peluang kepada atlit muda dan orang ramai berinteraksi dan melakukan sukan bersama.

Acara itu, yang diadakan di stadium Kegiatan Kokurikulum Kementerian Pendidikan di Evans Road Sabtu lalu, dianjurkan oleh cabang belia Pusat Harvest Care, Kelab W.A.D!

Bertemakan *Impikan Lebih Hebat*, karnival sukan yang tidak bertujuan mencari keuntungan itu menampilkan 1,700 atlit dan sukarelawan.

Acara yang diadakan kali keenam itu bertujuan membantu golongan muda merealisasikan potensi dan membina semangat mereka agar membangunkan impian yang lebih besar.

Melalui interaksi bersama golongan yang berbeza, ia diharap memberi inspirasi kepada belia agar mengatasi hambatan masing-masing dalam mengejar impian mereka.

Tetamu terhormat di acara itu, Menteri Kebudayaan, Masyarakat dan Belia, Cik Grace Fu, berharap melalui interaksi golongan itu, anggota masyarakat dapat meningkatkan kesedaran dan menghargai kebolehan dan kekuatan golongan lain.

Bagi menjayakan Romp 17, Kelab W.A.D! bekerjasama dengan Majlis Sukan Golongan Kurang Upaya Singapura (SDSC) untuk menganjurkan pertandingan bola keranjang istimewa antara pemain berkerusi roda dengan orang ramai.

Ini untuk menggalakkan interaksi antara kededua pihak dan menjalin persahabatan antara mereka melalui permainan.

Cik Fu turut turun padang dan mencuba menggunakan kerusi roda untuk bermain sukan tersebut.

Berucap di acara itu, Cik Fu berkata:

“Berdasarkan kejayaan Romp pada tahun-tahun sebelum ini, saya sangat gembira melihat penganjur te-

rus memberikan tumpuan ke arah membangunkan semangat inklusif.

“Kita memerlukan anak muda yang berani bermimpi. Jadi, saya menggesa anda agar berani mengejar impian anda.

“Dengan tekad, ketekunan dan sikap positif, anda boleh mengatasi halangan di hadapan anda.”

Selain SDSC, Pusat Harvest Care juga bekerjasama dengan Yayasan SportCares yang menaja Romp 17.

Presiden Pusat Harvest Care, Reverend Bernard Foo, berkata:

“Bagi kami, sebagai pertubuhan bukan mencari keuntungan, belia kami menyumbang dengan memecahkan tembok pemisah antara pemuda cukup sifat fizikal dengan mereka yang kekurangan dari segi itu.

“Saya harap dapat menyaksikan orang ramai memahami dan menggalakkan satu sama lain, di samping meraih inspirasi daripada cerita yang dikongsi serta mereka saling memberi galakan ketika bermain, dengan matlamat yang sama.” –

► FARAH REZAL



BERINTERAKSI MELALUI SUKAN: Cik Grace Fu (*berseluar merah*) bermain bola keranjang bersama orang awam dan para atlit, termasuk golongan kurang upaya, di karnival sukan belia tahunan Romp. – Foto KHALID BABA